

# TEZAU LITURGIC

21 IUNIE

# ACATISTUL SF. CUVIOS- MĂRTURISITOR GHEORGHE LAVROV DE LA DANILOV



MOSCOVA, 2000



# **Акафист преподобноисповеднику Георгию Даниловскому**

## **Кондак 1**

Избранный от Подвигоположника Господа Иисуса новый страстотерпче и молитвенниче пречудный, преподобне отче наш Георгие, обители Даниловой похвало и украшение, воспевающе честныя подвиги и еже за Христа страдания твоя, хвалебное пение приносим ти:

Радуйся, преподобне Георгие, исповедниче Христов.

## **Икос 1**

Ангелоподобную доброту души твоея провидев, всея твари Создатель молитву твою чистую приемлет и таинственно от мощей Игумена земли Русския Сергия путь в Оптину пустынь тебе указывает, аможе всею душою устремился еси, сего ради восхваляем тя сице:

Радуйся, молитвою матере во иночество избранный.

Радуйся, благодатию Божией призванный.

Радуйся, от юности мира отрекийся.

Радуйся, безплотным подобен явивыйся.

Радуйся, цвете райского саждения.

Радуйся, источниче сладкого утешения.

Радуйся, очищенный в горниле искушений.

Радуйся, многия души приведый ко спасению.

Радуйся, преподобне Георгие, исповедниче Христов.

## **Кондак 2**

Видя тя настоятель отрока еще мала суца  
никакоже восхоте тя во обитель прияти, обаче  
молитвою преподобнаго Амвросия и  
настоянием матери умолен, премени изволение  
о тебе, да поеши со иноками Богу: Аллилуия.

## **Икос 2**

Разум прозорлив стяжевая, прохождаше  
послушания иноческия да во всяком деле  
исправлен будеши, паче же смирению и  
послушанию научишия. Да и мы, видяще от  
силы в силу восхождение твое, бремя суетных  
попечений отвергнем и тебе вопием прилежно:

Радуйся, язвы Господа на теле носивый.

Радуйся, себе воли Божией покоривый.

Радуйся, покаянием очищенный.

Радуйся, доброделанием освященный.

Радуйся, равноангельное житие до конца возлюбивый.

Радуйся, Христа на милость преклонивый.

Радуйся, честное Святаго Духа жилище.

Радуйся, Ангелов достойное увеселение.

Радуйся, преподобне Георгие, исповедниче Христов.

### Кондак 3

Сила Вышняго укрепляше тя, блаженне, егда усмотре тя Господь достойна чина Ангельскаго, ты же, пострижение от настоятеля, яко от Христа, прием, полагал еси на сердце глаголы жизни вечныя и к небеси мысленно устремлялся еси, идеже Ангели поют Богу: Аллилуия.

### Икос 3

Имея Господь промышление о спасении всякой плоти, постави тя настоятелем в обители Мещовстей, яве тем показуя высокия добродетели твоя, да и о братии печешися и обитель благолепно устроиши и слышиши от нас таковая:

Радуйся, обители устройтелю добрый.

Радуйся, душ попечителю бодрый.

Радуйся, на всяком месте Богу трудивыйся.

Радуйся, тем от страстей свободивыйся.

Радуйся, пастырю, Богом поставленный.

Радуйся, ныне от паствы прославленный.

Радуйся, начальником светлый образе.

Радуйся, послушником кроткое украшение.

Радуйся, преподобне Георгие, исповедниче Христов.

### Кондак 4

Бурею безбожных гонений вся Церковь Русская потрясена, твое же попечение не токмо о братии, но и об окрестных людех бысть, егда

таяся подавал еси ко двором мешцы с мукою, подвизая всех благодарне пети Богу: Аллилуия.

#### Икос 4

Слышаще близлежащия веси, яко поругание обители Мещовстей бысть и самаго тя во узах суца и от навет злокозненных смерть прияти имуща, зело печаловахуся, обаче не остави тя Господь. Но посла ти во уверение о спасении прежде почивших матерь твою и купца, егоже в жизнь вечную напутствовал еси и семью от разорения избавил еси. Тем похвальная приносим ти:

Радуйся, в слезном молении услышанный.

Радуйся, милостивый, от Господа помилованный.

Радуйся, видением чудесным о спасении уверенный.

Радуйся, яко добрая дела твоя не суть забвенна пред Богом.

Радуйся, молитвы сокровище неистощимое.

Радуйся, любве богатство неисповедимое.

Радуйся, яко тебе ради и союзников твоих пощаде Господь.

Радуйся, яко тии последи чада духовныя тебе быша.

Радуйся, преподобне Георгие, исповедниче Христов.

### Кондак 5

Боготочнаго источника исцелений яви тя Господь в темнице, преподобне Георгие, егда хитрости врачебней обучился еси, темже сугубое избавление страждущим приношаше, душевныя раны купно с телесными врачуя, сего ради во устах сущии воспеваху: Аллилуия.

### Икос 5

Видя тя Преосвященный Кирилл попечителя о душах изрядна, благослови на подвиг старчества, ты же изволение имел еси со страждущими в темнице до конца пребыти, да им послужиши. Мы же, произволению твоему дивящися, вопием:

Радуйся, источниче сострадания приснотекущий.

Радуйся, преподателю Тайн Христовых непорочный.

Радуйся, Божиего домостроительства соучастниче.

Радуйся, славы Господни сопричастниче.

Радуйся, твердое упование в бури неверий.

Радуйся, скорое утешение во тьме озлоблений.

Радуйся, ночь жития сего мудро проходивый.

Радуйся, невечерний день Царствия Божия предвозвестивый.

Радуйся, преподобне Георгие, исповедниче Христов.

### **Кондак 6**

Проповедника тя благочестия и духовника изрядна видя Преосвященный Феодор поручаяся из темницы тя изволяет и в обители Даниловой особо устрояет, да тамо служение твое исполниши и поют вси московскийи людие: Аллилуия.

### **Икос 6**

Возсия во обители Даниловой, яко светильник многосветлый, преподобный Георгий во дни великих смут и неверия, обышедших страну нашу, путь спасения всем показуя и яко кокош

под криле своя птенцы собирая, да научиши их Божия Богови воздавати и веру истинную блюсти несумненно, да и мы взываем ныне:

Радуйся, на путь правый наставляяй.

Радуйся, Царство Небесное возвещаяй.

Радуйся, наставниче смиренный.

Радуйся, молитвенниче прикровенный.

Радуйся, любви Христовой вместилище.

Радуйся, в море житейшем пристанище.

Радуйся, радости райския провозвестниче.

Радуйся, избавления неложный благовестниче.

Радуйся, преподобне Георгие, исповедниче Христов.

### **Кондак 7**

Хотя пастве твоей спастися и в разум совершенный приити, всем был еси кладезь премудрости и милосердия, да всех приобрящещи и ко Христу приведещи поющих: Аллилуия.

## Икос 7

Новую воздвиг на тя напасть враг рода человеческого, хотя разлучити тя от паствы твоея и до конца погубити, но ничтоже успе, не оставяху бо тя чада твоя на стране далече, паче же твой молитвенный покров познаваху, несть бо лишения любящим Господа, тем и мы с ними вопием:

Радуйся, отче духовный, чада твоя не оставляй.

Радуйся, молитвою нас всех заступаяй.

Радуйся, терпением укрепивыйся.

Радуйся, кротостию оградивыйся.

Радуйся, любви евангельския учителю.

Радуйся, целомудрия честнейший рачителю.

Радуйся, яко чада твоя Господа взыскупают.

Радуйся, яко Ангели о тебе торжествуют.

Радуйся, преподобне Георгие, исповедниче Христов.

## Кондак 8

Дивно и пречудно есть твое молитвенное служение на земли Казахской, непрестанно бо службы совершал еси и милость Божию на люди, иже дал тебе есть Господь, привлекал еси, да поем вси Богу: Аллилуия.

## Икос 8

Весь был еси Богу освящаяся и еже со Христом быти паче всех вожделевая, темже и лишения претерпевая, страха смертного чужд был еси и странен на земли, к Небесному Отечеству устремляшеся, темже приими от нас таковая:

Радуйся, стяжавый благодать Святаго Духа.

Радуйся, по всему Христу уподобивыйся.

Радуйся, идеже главы подклонити не имевый.

Радуйся, изгнание кротце претерпевый.

Радуйся, Небесное Отечество возлюбивый.

Радуйся, земное странствие добре совершивый.

Радуйся, пришельца себе помышляяй.

Радуйся, в вечныя кровы душу устрояяй.

Радуйся, преподобне Георгие, исповедниче Христов.

### Кондак 9

Всякое человеческое мудрование умолкает, егда утешение Божественное находит, тако несть нам словеси рещи о свете Фаворстем, вся небеса в праздник Преображения осиявающим, токмо тебе и дщери твоей духовней явленном поющим: Аллилуия.

### Икос 9

Ветия многовещанная аще и возмогли быша исчислити лишения твоя, обаче не разумеют долготерпения твоего, егда болезнь последняя найде на тя, тебе же все болезнование о чадах твоих бысть, иже купно с тобою страдаста. Тем тебе вопием:

Радуйся, паче себе ближних возлюбивый.

Радуйся, мученичеством безкровным себе украсивый.

Радуйся, возстания телесныя поправый.

Радуйся, Божественному безстрастию поревновавый.

Радуйся, Царствие Божие внутри себе  
восхитивый.

Радуйся, правды ради душу твою положивый.

Радуйся, правило веры и благочестия.

Радуйся, радование Христова благовестия.

Радуйся, преподобне Георгие, исповедниче  
Христов.

### **Кондак 10**

Спасти хотящу душу твою, весь ти путь бысть  
от грехов разрешати и причащати, темже и  
сподоби тя Господь со Святою Чашею в руку  
скончаться, да познают маловернии, яко  
честна пред Господем смерть преподобных Его,  
и да зовут Ему: Аллилуия.

### **Икос 10**

Стена необоримая чадом твоим и по смерти  
являешия овогда видением сонным, овогда  
пришествием видимым утешаеши, во еже не  
быти им в сем житии многоскорбнем сирыми и  
унылыми, зовущим тебе:

Радуйся, обещавай слышати всех к тебе  
приходящих.

Радуйся, даруяй исцеление болящим.

Радуйся, скорби от сердец отымаяй.

Радуйся, греховную печаль потребляяй.

Радуйся, великое в бедах утешение.

Радуйся, в немощех нетрудное поможение.

Радуйся, в страстном борении воззвание.

Радуйся, в нерадении скорое покаяние.

Радуйся, преподобне Георгие, исповедниче Христов.

### **Кондак 11**

Пение новое Церковь Русская днесь приносит, прославляя страстотерпцы и исповедники своя, святители же, монаси и мирстии, и о гресех чад своих въздыхает, да Христос Господь, зиждяй Церковь на крови мученик Своих, и наша грехи очистит и помилует всех зовущих Ему: Аллилуия.

### **Икос 11**

Светильник присногорящий паки обрел еси обитель Данилову пристанищем себе, Георгие

блаженне, в ней же ныне мощами почиваеши и слушаеши всех зовущих тебе:

Радуйся, в Небесном Чертозе живущий.

Радуйся, Господеви непрестанно поющий.

Радуйся, обители твоея страже неусыпающий.

Радуйся, мощами в ней пребывающий.

Радуйся, яко тобою Христос прославляется.

Радуйся, яко тобою преисподняя посрамляется.

Радуйся, преподобных сподвижнике.

Радуйся, мученик сопричастнике.

Радуйся, преподобне Георгие, исповедниче Христов.

### **Кондак 12**

Благодать испроси нам у Творца и Бога, прибегающим к покрову твоему и духовнаго твоего водительства взыскующим, во еже пети с тобою: Аллилуия.

### **Икос 12**

Поюще многия подвиги твоя, преподобство вкупе с исповедничеством, духовничество с

непрестанным молением, проповедничество и внутреннее безмолвие, прибегаем к действенной молитве твоей, еюже ты нас от расслабления возстави и на путь покаяния направи, ублажающих тя:

Радуйся, яко Царю Небесному предстоиши.

Радуйся, яко о всех нас тепле ходатайствуеши.

Радуйся, иноком наставниче премудрый.

Радуйся, послушником игумене предобрый.

Радуйся, чадом отче прелюбезный.

Радуйся, просящим молитвенниче неусыпный.

Радуйся, благочестивых людей услаждение.

Радуйся, монашествующих удобрение.

Радуйся, преподобне Георгие, исповедниче Христов.

### **Кондак 13**

О священная главо, преподобне отче наш Георгие, Даниловския обители молитвенниче, Христа Бога от юности возлюбивый, и подвигом добрым Ему угодивый, веру же православную до смерти соблюдый, и ныне Престолу Божию предстоя, прими малое сие

хваление от чтущих тя, и молися ко Господу о Церкви и Отечестве нашем, и о верою живущих в нем, да спасение улучивше, поем Ему: Аллилуия.

Сей Кондак читается трижды, затем Икос 1 и Кондак 1

### Молитва

О преславный угодниче Божий, преподобне отче Георгие, Даниловы обители похвало и украшение! Ты от юности своея монашеское житие возжелал еси, в немже подвизався, любовь Христову стяжал еси, и был еси пастырь добрый притекающим к тебе: последи же изгнания и многи скорби претерпев, Небесное Царство наследовал еси. И ныне призри на нас, чад твоих, молящихся тебе, и управи души наша ко спасению; обитель же нашу святую миром и благочестием укрепи, да чистым житием благоугодим Богу, Ему же всякая слава подобает, честь и поклонение, во веки. Аминь.

